

Vuk'uzenzele

O e tlisediwa ke Ditlhaeletsano tsa Puso (GCIS) English/Setswana Ngwanaitseele 2022 Kgatiso 1

Letsholo la go matlafatsa batswasetlhabelo le dira gore batho ba nne le tsholofelo

Owen Mngadi

Letsholo la go Matlafatsa Batswasetlhabelo kwa Thohoyandou (TVEP) le leka ka natla go dira gore baagi ba boe ba nne le tshepo mo dikgatong tsa molao tsa phimolakeledi ka go diragatsa matsholo a yona a a tseneletseng ao maitlthomo a ona e leng go tswa thuso batswasetlhabelo ba ba fetileng mo mathateng a ditiragalo tsa go bogisa basadi (GBV) le a go betelwa ka go ba tlamela ka ditirelo tsa go ba thoba maikutlo le tsa go fodisa tlhalo-ganyo.

Letsholo leno le le simolotsweng kwa porofenseng ya Limpopo le le nang le sebaka sa dingwaga di le 20 le teng kwa Sepetlele sa Tshilidzini le kwa Sepetlele sa Donald Frasermo mo Masepaleng wa Selegae wa Thulamela.

Mokaedi wa Namaotshware, Fhatuwani Manthada, a re maitlthomo a letsholo leno ke go dira gore baagi botlhe ba Thohoyandou ba se tlhole ba itshokela ditiro tse dintintsintsi tsa go sotla batho ba bangwe ka thobalano, go bogisa basadi mmogo le go bogisa bana, segolobogolo jang jaaka ditiragalo tseno e le tsona tse di renang mo

lefelong leno.

O tlhalositse gore mo nakong e e fetileng dipalopalo di ne di bontsha gore dikgetse tsa petelelo ke tsona tse di neng di le kwa godimo mo Thohoyandou, mme fa e sale letsholo leno la TVEP le simolola go na le kgatelopele e e namatshang fa go tla mo go fokotseng ditiragalo tseno jaaka le lemosa baagi ka ditiragalo tseno mmogo le go tlamela batswasetlhabelo ka ditirelo tsa go ba thoba maikutlo.

Jaaka mo lefatsheng go tla bo go ketekiwa Letsholo la Matsatsing a le 16 la go Ema Kgatlhanong le Tirisodikgoka mo Basading le mo Baneng go simolola ka la bo 25 Ngwanaitseele go fitlha ka la bo 10 Sedimonthole, Manthada a re o kgotsotswa ke seo se setseng se dirilwe mo letsholong leno jaaka le rutila baagi gore ba itsi ditshwanelo tsa bona le go ba rotloetsa go tshwarisa ditlhokotsebe tse di dirang melato eno.

“Mo kgwedding e nngwe le e nngwe TVEP e amogela batho ba le magareng ga ba le 80 le ba le 100 ba e leng batswasetlhabelo ba tirisodikgoka ya batho ba ba amanang, mme ka fa letlhakoreng le lengwe kgwedi e nngwe le e nngwe go bulwa dikgetse tsa petelelo di le

magareng ga di le 45 go fitlha go di le 50,” Manthada o tlhalositse jalo.

Lefelo la ditirelontsi la letsholo leno le tlamela batswasetlhabelo ka ditirelo tse dintsi tse di farologaneng tse ba di tlhokang, mmogo le tsa go ba thapela babueledi, tsa go sireletsa batswasetlhabelo gore ditlhokotsebe di se tswewe le go ba tshosetsa, ditirelo tsa go disa dikgetse tseno fa di le kwa kgotla-tshekelo, ditirelo tsa go ba thoba maikutlo le go ba tlhatlheleka ka kitso e e rileng go tshwana le go ba tlhatlhelela ka bokgoni, mme seno se thusa batswasetlhabelo gore ba kgone go ikemela mo botshelong ntle le go thusiwa ke bao ba neng ba ba bogisa.

Manthada a re mo go direng gore batswasetlhabelo ba se kgopisiwe lekgetlo la bobedi mo moweng, TVEP e tshwarisane tiro le Tirelo ya Sepodisi sa Aforika Borwa (SAPS), Lefapha la Boitekanelo mmogo le Lefapha la Tlhabololo ya Loago.

“Mo dikgetseng tse di amanang le petelelo, batlhankedi ba lephata la maokelo mmogo le ba sepodisi ba etela lefelo la TVEP le motswasetlhabelo a tshabetseng kwa go lona go tla go bula kgetse kgatlhanong le setlhokotsebe sa

tiro eo mmogo le go tla go thoba motswasetlhabelo maikutlo,” o tlhalositse jalo.

Mafelo a TVEP a amogela batswasetlhabelo sebaka sa matsatsi a le 14, mme le fa go le jalo, a kgona go amogela motho sebaka sa matsatsi a a fetang ano segolo jang fa e le gore lapa lotlhe le tshabetseng koo kgotsa fa e le gore motswasetlhabelo yo a tshabetseng koo ke ngwana.

“Re na le go tshwara matsholo a go buisana le baagi go ba tlhatlhelela ka kitso mabapi le ditshwanelo tse ba nang le tsona. Re thusa baagi ba feta milione ba kwa Thohoyandou le ba kwa metseng e e gaufi le Thohoyandou. Re kgonne go dira gore baagi ba boele ba nne le tshepo mo ditheong tsa molao ka ntlha ya go dirisana le mapodisi,” o tlhalositse jalo.

Letsholo leno la TVEP le dirile gape gore batho ba le 44 ba nne le ditiro mo maphateng a lona a a farologaneng a a jaaka lephata la lona la matlole, la tlhokomelo ya badiiredi mmogo le la tshekatsheko ya tiro ya lona.

Le fa tota letsholo leno le tlamelwa ka matlole a a potlana a a kanaka R90 000 mo kotareng e nngwe le e nngwe mo ngwageng

go tswa kwa Lefapheng la Puso ya Porofense ya Limpopo la Tlhabololo ya Loago, COVID-19 e ne ya ama letsholo leno la TVEP ka tsela e e sa itumediseng gonne batho ba bantsi ba ba tleng ba tlamele letsholo leno ka matlole ba ne ba ikgogela morago, mme seno se ne sa dira gore tiro ya lona e se tsamaisiwe ka thelelo.

Le fa go le jalo, letsholo leno le ne la tswelwa mosola thata ke Letloletlamelo la Tsibogelo ya Tirisodikgoka e e Totileng Batho ba Bong jo bo Rileng le Dipolao tsa Basadi (GBVF), le le thankgolo-tsweng mo kgwedding ya Tlhakole monongwaga ke Moporesitente Cyril Ramaphosa, le Foramo ya Basadi ba Aforika Borwa ya Boditshabats'haba mmogo le badiresanimmogo mo mererong ya loago.

Letsholo la TVEP ke le lengwe la matsholo a ntlha a a lwantshanang le GBV le le tlametsweng ka matlole.

Jaaka go kgonnwe go bokeletsa madi a le kanaka R128 milione go tswa kwa ditlamong tsa poraefete, le go tswa kwa ditheong tse di leng

E tswella pele leqepheng la 2



SASSA encourages non-smart phone owners not to choose EFT payment method

Page 5



BABALESEGA

ENTA O BOLOKE AFORIKA BORWA

MMODO RE KA PENYA MOBARE WA CORONA



Toilet paper business leaves man blushing with pride

Page 12



Go buisa **Vuk'uzenzele** tsenya epe ya GOVAPP e o ka e fitlhelang mo go:



Morago o batle SA Government mo go Google playstore kgotsa mo go appstore

IKGOLAGANYE LE RONA MO GO  Vuk'uzenzele

Diwebesaete ke: www.gcis.gov.za Imeile ke: vukuzenzele@gcis.gov.za

www.vukuzenzele.gov.za Mogala ke: (+27) 12 473 0103

Tshedimosetso House:

1035 cnr Frances Baard and Festival streets, Hatfield, Pretoria, 0083

E tswela go tswa mo go tsebe 1

mo diatleng tsa puso le tsa porae-fete, Letloletlamelo leno la GBVF le tla thusa le go ema nokeng dikgato tsa go tsenya tirisong Leano la Naga la Togamaano mo Mererong ya GBVF.

Mo ngwageng ono TVEP e neilwe madi a le kanaka R250 000 mme mo ngwageng o o tlang wa

2023 e tla neelwa madi a mangwe gape.

Manthada a re madi ano a kgonne go thusa TVEP gore e kgone go thusa batho ba bangwe ba bantsi mmogo le go dira gore letsholo leno le se phutlhamo.

Murendeni Vhengani, yo a nang le dingwaga di le 26, ke yo mongwe wa batswasetlhabelo ba ba thusitsweng ke TVEP jaaka a ne a nna le mookapelo yo a neng a mo bogisa. E ne le mosetsa-


nyana wa gagwe wa dingwaga di le nne ba ne ba nna kwa lefelong la TVEP sebaka se se kana ka dikgwedi di le 46.

Lefelo leno le ne la mo thusa gore a tshwarise mookapelo yoo mmogo le go kopa taelo ya kgo-tlatshekelo e e laelang motho yo a go bogisang go se tlhole a itshu-nyatshunya mo botshelong jwa gago. Mookapelo yoo o santse a seka le ka letsatsi leno.

“Ba ne ba nkamogela ka diatla

tsoopedi morago ga gore ke tshabele mo go bona ke tswa mo tshotlegong ya dijarahara. Ke ne ka ikutlwa gore mo gona ke bolokesegele. Jaanong ga ke sa ikobonya,” o tlhalositse jalo.

Monnasetulo wa Letloletlamelo la GBVF, e bong Ngaka Judy Dlamini, o rile go santswe go samaganwe le go fetisa dituelelo tsa tlamelo ya matlole go mekgatlho e le 108 e dikopo tsa yona di atlegile.

Mo nakong e e sa fediseng pelo tshedimosetso e e ka ga go diriwa ga dikopo lekgetlo la bobedi e tla phasaladiwa mo webesaeteng ya: <https://gbvf.org.za/> 

Go ikgolaganya le TVEP, letsetsa Manthada mo go **0647715264** kgotsa o romele imeile mo go: tj@tvep.org.za.

Dikopo tsa go enngwa nokeng ka matlole a go ya sekolong mo ngwageng wa 2023 tsa NSFAS di butswa

Dikopo tsa go enngwa nokeng ka matlole a go ya sekolong mo ngwageng wa 2023 tsa Sekema sa Naga sa Thuso ya Baithuti ka Ditšhelete tsa go Tswela tsa Dithuto (NSFAS) di butswa.

Tona ya Thuto e Kgolwane, Saense le Boitshimolodi, Ngaka Blade Nzimande, o dirile kitsiso eno sešweng jaana fa a ne a tshwere kopano le bobega-kgang.

Tona Nzimande a re mono-ngwaga go tserwe tshweetso ya gore dikopo di bulelwe ka pele go gaisa mo ngwageng yo o fetileng, maitlho e le go neela bao ba batlang go tsenya dikopo nako e ntsi e ba e tlhokang gore ba kgone go romela dikopo tsa bona mmogo le ditokomane tse di tsegetsang dikopo tsa bona.

Fa a ne a sedimosetsa setšhaba ka seo letlole la NSFAS le se dirileng mo ngwageng wa dithuto wa 2022, Tona Nzimande o rile madi a le kanaka R43 bilione a neetswe sekema seno gore se duelele dithuto tsa bao se ba thusang, mmogo le go ba neela le madi a dijo le a dipalangwa, mmogo le a dibuka le didirisiwa tse dingwe tsa go ithuta.

O tlhalositse gore ba amogetse dikopo di le 985 672 mme mo go tsona di le 140 636 ke tse di sa atlegang go ka bona thuso.

Mo dikopong tse di amogetsweng tseo, di le 739 526 di amogetswe gore di tla amogelwa ka botlalo fa fela beng ba tsona

ba ka kgona go finyelela go ikwadisa le ditheo tsa thuto e kgolwane tse ba dirileng dikopo mo go tsona.

“Bontsi jwa dikopo tse di sa atlegang selo se segolo se se dirileng gore di se atlege ke ka ntlha ya gore badiradikopo ba tsona ga ba felegetsa dikopo tsa bona ka ditlankana tsa bopaki jo bo tlhokagalang; ba bangwe le-tseno la malapa a bobona le feta leo le beilweng; ba bangwe ke ka ntlha ya gore ba setse ba na le lekwalo la thuto e kgolwane le ba le dueletsweng ke NSFAS mme ka jalo ga ba sa dumelelwa go ka duelelwa dithuto tsa lekala la kholeje ya TVET,” Tona Nzimande o tlhalositse jalo.

Go ya ka tshedimosetso e e leng teng mo webesaeteng ya NSFAS, go simolola ka ngwaga wa dithuto wa 2021, NSFAS ga e sa tlo tlhole e duelela dithuto tsa bao ba godisang maemo a bona a thuto ya morago ga go konosetsa dithuto tsa ntlha tse digolwane. Fano go buiwa le ka disetifikheiti, ditipoloma, ditekerii, ditekerii tsa masetase le tsa Bongaka tsa maemo a thuto ya morago ga go konosetsa dithuto tsa ntlha tse digolwane.

Seno se raya gore sekema seno se duelela lekwalo le le lengwe fela la thuto e kgolwane e leng Tekerii ya Ntlha.

Go tokafatsa thulaganyo ya go dira dikopo

Mo go lekeng go tokafatsa thula-

ganyo ya bona ya go dira dikopo go dira gore e nne bonolo go dirisiwa ke badiradikopo, Tona Nzimande a re monongwaga NSFAS e tlele ka dikarolo di le dintsinzana tsa go tokafatsa thulaganyo eno go dira gore go nne bonolo go dira dikopo.

A re thulaganyo ya NSFAS ya go dira dikopo mo inthaneteng seopogo sa yona se fetotswe maitlho e le go dira gore e se kopakopanye ditlhogo tsa badiradikopo mmogo le go dira gore e se farologane go le kalo le dithulaganyo tse dingwe tse badiradikopo ba tlwaetseng go di dirisa go tshwana le *WhatsApp*, *Twitter*, *Facebook* le *Instagram*.

“Thulaganyo eno ka boyona e nolofaditswe mme le dipotso tse di bodiwang mo go yona go bonolo thata gore mang le mang mo setšhabeng a tlhologanye gore di tlhoka eng. Se sengwe gape ke gore jaanong badiradikopo ba ka kgona go emisa seo ba se dirang ba boe ba tswela pele ka seo ba neng ba se dira mo nakong e e tlang ntle le gore seo ba setseng ba se dirile se latlhege mme ba tshwanele ke go simolola kwa tshimologong, seno se ne se se teng mo thulaganyong e e neng e dirisiwa mo nakong e e fetileng, o tlhalositse jalo.

“Mo godimo ga diphetogo tse di dirilweng, NSFAS e tsentse tirisong dithulaganyo tse dingwe tse dintšhwa tsa go dira

dikopo go thusa badiradikopo ba maemo a a farologaneng segolo jang jaaka badiradikopo ba le bantsi e le bašwa mme bontsi bo ithatela go dirisa ditsela tsa thekenoloji,” Tona Nzimande o tlaleletse ka go rialo.

Dithulaganyo tse dintšhwa tseno go akareditswe tsa mananeo a megala, a di-SMS le *WhatsApp*, mo motho a ka kgonang go dira kopo ya go tlamelwa ka matlole a NSFAS, mmogo le go sala morago kopo ya gagwe gore e tsamaya kae le go kgona go e phimola fa a batla mmogo le go kgona go dira dilo tse dingwe gape tse dintsi tse a ka tlhokang go di dira. Mo malobeng dilo tseno tsotlhe di ne di diriwa fela mo webesaete.

Se sengwe gape, go nete-fatsa gore ga go kopo epe e e tlogelwang kwa morago, Tona Nzimande o tlhalositse gore NSFAS e tla rebola letsholo le le tla lebang kwa baaging, go dira bonnete jwa gore batho ba ba senang didirisiwa tse di tlhokagalang tsa thekenoloji tsa go dira dikopo ba neelwa thuso e ba e tlhokang gore le bona ba kgone go dira dikopo.

O ka bona jang Basari ya NSFAS?

O na le matshwanedi a go neelwa basari ya NSFAS fa e le gore o moagi wa Aforika Borwa yo a batlang go ya sekolong mo ngwageng wa 2023 kgotsa fa e le

gore o setse o ntse o le kwa yuni-besiting kgotsa kwa kholejeng ya TVET mme o na le dintlha tse di latelang:

- O le yo mongwe wa baithuti ba ba amogelang mogolo wa bana wa SASSA kgotsa
- Kwa lapeng mogolo wa batsadi ka bobedi fa o kopanngwa o sa fete R350 000 ka ngwaga kgotsa
- O le motho yo a nang le bogole, mme mogolo wa lapa fa o kopanngwa ga o a tshwanela go feta R600 000 ka ngwaga kgotsa
- O le moithuti wa kwa yunibesiti yo a simolotse- ng dithuto tsa gagwe tsa kwa yunibesiti mo ngwageng wa 2018 mme mogolo wa ka fa lapeng o sa fete R122 000 ka ngwaga.

Paka ya go dira dikopo e tla tswalelwa ka la bo 31 Ferikgong 2023. – SAnews.gov.za

Etela webesaete ya NSFAS mo go www.nsfas.org.za gore o bone tshedimosetso ka botlalo ka ditokomane tse di tlhokegang go felegetsa kopo ya gago mmogo le go bona tshedimosetso ka thulaganyo ya go dira dikopo.



government communications

Department: Government Communication and Information System
REPUBLIC OF SOUTH AFRICA

Tel: 012 473 0353

Email: vukuzenzele@gcis.gov.za

Address: Private Bag X745, Pretoria, 0001

Head of Editorial and Production

Regomoditswe Mavimbela
Regomoditswe@gcis.gov.za

Acting Editor-in-Chief

Zanele Mngadi | Zanelemngadi@gcis.gov.za

Acting Managing Editor

Tendai Gonese | tendai@gcis.gov.za

News Editor

More Matshediso

Graphic Designers

Tendai Gonese | Benny Kubjana

Production Assistants

Jauhara Khan | Sebastian Palmer

Language Practitioners

Nomgcibelo Motha | Boitumelo Phalatse
Thandolunye Khulu | Mahanyele Ramapala



Vuk'uzenzele
is published by Government Communications (GCIS)

Distributed by:
ON THE DOT

Printed by:
RISE SUN PRINTERS
The Johannesburg Edition

The material in this publication may be reproduced, distributed, or transmitted in any form or by any means, including photocopying, recording, or other electronic or mechanical methods, without the prior permission of the publisher on condition that this publication shall be credited as the source.



Milione wa ditšhono tsa ditiro le tsa go iphedisa, mme palo eno e tswela go golela pele



Mo dingwageng tse di ka fa tlase ga di le pedi tse di fetileng, re ne ra thankgolola Letsholo la Maditshegetso a go Tlhola Ditiro la Moporesitente maitlomo e le go tlhola ditiro le go ema nokeng ditsela tse batho ba iphedisang ka tsona jaaka e le karolo ya go ema nokeng dikgato tsa go tsosolosa ikonomi ya rona morago ga gore e ripitliwe ke leroborobo la COVID-19.

Letsholo la Maditshegetso a go Tlhola Ditiro la Moporesitente fa e sale le simololwa le fitlhetse palo e le ipeetseng yona ya go dira gore batseakarolo ba le milione ba nne le seabe.

Se re se fitlheltseng seno ke ka ntlha ya tirisanommogo e re nnileng le yona mmogo re le puso le setšhaba ka kakaretso mmogo le makala a poraefete, mekgatlho ya baagi le ba bangwe gape ba bantsi.

Ka ntlha ya fa go tsaya nako gore re tsosolose ikonomi le go dira gore e tshole ditiro ka lebelo le re le tlhokang, letsholo leno le na le mosola mo go tlholeng ditiro.

Fa re tswela ka dikgato tsa go godisa ikonomi gore e kgone go re tlholela ditiro tse di nang le seriti tse di tla nnelang ruri ka bontsi jo bo kgonagalang, ka fa letlhakoreng le lengwe re tla tswela go agelela mo godimo ga tseo re atlegileng mo go tsona ka ntlha ya Letsholo la Maditshegetso a go Tlhola Ditiro la Moporesitente mme ra godisa mosola wa lona. Re tshwanetse

gape re akgole le kgato ya go itharabologelwa ga ditiro. Kgato eno le yona ke e nngwe ya tse di emang nokeng ditsela tse di botlhokwa tsa go tsosolosa ikonomi.

Mo maemong a o fitlheleng e le gore batho ba palelwa ke go iponela ditiro ka ntlha ya fa ba sena maitemogelo mo tirong, matsholo ano a rarabolola matsapa ano ka go ba tlamela ka ditšhono tsa go bokeletsa maitemogelo mo ditirong tsa maemo a a kwa godimo.

Mo letsholong le legolo le le enngweng nokeng ke letsholo leno la moporesitente, go naya motlhalanyana fela, bašwa ba ka nna 600 000 ba neilwe ditšhono tsa ditiro tsa go thusana le barutabana kwa dikolong di feta di le 22 000 ka fa nageng. Batsamaisi ba dikolo, barutabana le bannaleseabe mo dikolong botlhe ba a dumelana gore go nneng teng ga bathusi ba barutabana go nnile le mosola o mogolo mo go direng gore tsotlhe di tsamaye ka tshiamo mo dikolong.

Batho ba bantsi ba ba neng ba iphedisa ka go itirela letseno ka ntlha ya leroborobo ba ne ba ketefalelwa ke botshelo. Lephata la boitapoloso bogolosegolo le nnile le matsapa a a seng kana ka sepe. Mo lephateng leno batho ba ne ba thusiwa ka bontlhabo-ngwenyana jo bo rileng gore ba kgone go itlholela ditiro le go tlholela batho ba bangwe ditiro.

Metshameko ya difilimi, mmimo le metshameko ya mo seraleng e ba kgonneng go e dira jaanong e kgona go ba direla letseno ka

go rekisetsa ditheo ditshwanelo tsa go ka e tshameka, ka go rekisa dithekete mmogo le ka go iponela madi a a tswang mo go rekisiweng ga metshameko eno.

Matsapa ano otlhe a na le mosola mo go godiseng lekala leno.

Letsholo la Maditshegetso a go Tlhola Ditiro la Moporesitente le eme gape nokeng le ditsela tse batho ba iphedisang ka tsona.

Balemirui ba feta ba le 140 000 ba neetswe diboutšhara tsa go reka ditlhagisiwa gore ba kgone go simolola ka go lema le go godisa dikgwebo tsa bona morago ga gore di kgorelediwe ke COVID-19.

Yo mongwe wa bao ba unngwetsweng ke molemirui wa dingwaga di le 36 e bong Phindile Ngcoya wa kwa Richmond kwa porofenseng ya KwaZulu-Natal.

Ke yo mongwe wa ba le lesome bao malapa a bona a nang le dikgwebo tsa temothuo mme o tthalositse gore boutšhara eo a e amogetseng e tswetse mosola kgwebo ya gaabo e ntšhwa gore e se phutlame le go dira gore e kgone go itirela letseno.

Letsholo la Maditshegetso a go Tlhola Ditiro la Moporesitente le ema gape nokeng le bao ba weditseng dithuto tsa bona tse digolwane, ka go neela bao ba ithutetseng booki, dithuto tsa saense, tiro ya diatla le ba bangwe ditšhono tsa ditiro.

Diyunibesiti di le 26 di thusana le letsholo leno gore go thapiwe bao ba weditseng dithuto tsa bona mo diphatlhatirong tse di tsamaisanang le dithuto tse ba ithutetseng tsona.

Lefapha la Saense le Boitshimolodi le thankgolotse matsholo a le mantsinyana a boitshimolodi mo mererong ya saense go thusana le baagi, go tshwana le la Duzi uMngeni Conservation Trust, e leng letsholo le le thapang bašwa mo metseng e ba nnang mo go yona gore e nne

bona ba ba gogang kwa pele merero ya go tlhokomela tikologo e leng yona kgato ya go dira gore baagi ba nne le seabe mo go tsosoloseng metswedi ya metsi mo tikologong eo. Le lengwe la matsholo a lefapha leno ke le le thusang bao ba itshimololelang dikgwebo ka go ba thusa go kwala makwalo a go tshitshinya dikgwebo tse di tsamaisanang le ikonomi ya tshomarelo tlhago.

Matsholo a tlhokomelo ya tikologo a a thapang baagi le ona a botlhokwa thata mo setšhabeng gonne a tlhola ditiro tse di mosola mo setšhabeng. Fa go tla mo Letsholong la Maditshegetso a go Tlhola Ditiro la Moporesitente, lona le ema nokeng thuto mo dikolong, le tlhabolola mafelo a baipei, le thusa batho ba ba fetileng mo mathateng a tiriso-dikgoka e e totileng batho ba bong jo bo rileng (GBV), le thusa mo mererong ya tshomarelo ya tlhago mmogo le go ema nokeng boitshimolodi mo ditheong tsa go olela ditlakala.

Gore Letsholo la Maditshegetso a go Tlhola Ditiro la Moporesitente le thankgololwe e ne e le ka ntlha ya matsapa a botlhokatiro a a neng a retetse ka ntlha ya leroborobo la COVID-19. Le fa tota leroborobo leno le setse le fokotsegile, botlhokatiro bona bo santse bo le teng.

Letseno le go iponetsweng lona ka ntlha ya Letsholo la Maditshegetso a go Tlhola Ditiro la Moporesitente le thusitse tota dikgwebopotlana le dikgwebo tse di sa kwadisiwang semmuso tse di leng teng mo diikonoming tsa ka fa nageng. Batho bao ba thapilweng go thusana le barutabana mo dikolong kwa motseng wa Umgungundlovu mogolo wa bona ba o dirisa gona mo motseng oo. Go fela jalo le kwa Putsonderwater.

Go na le gore "ba ba dikobo di-khutshwane ba unngwelwe ka go sela mafofora mo maotong a bao

khumo ya bona e rothang le ka dinala", jaanong madi a neelwa fela metse e baagi ba yona ba a tlhokang thata. Madi ao a dirisiwa gona mo motseng wa bona mme 'fa a tswa foo a tsena' mo ikonoming e kgolo ya naga.

Ke ka ntlha ya seo letsholo leno re le biditseng la Maditshegetso gonne ikonomi yotlhe e a unngwelwa mmogo le baagi.

Ka ntlha ya Letsholo la Maditshegetso a go Tlhola Ditiro la Moporesitente, re kgonne go dira gore go nne le mafolofolo, go nne le maikemisetsa, go nne le boitlhamedi, go nne le boitshimolodi e bile gape go nne le ditšhono. Ka go dira jalo, re aga setšhaba se se tla re tswelang mosola.

Ke batho ba feta ba le milione ba ba unngwetsweng. Ke batho ba bantsi ba ba boneng mosola wa letsholo leno, bao ba unngwetsweng ka namana le bao ba bobona e leng bona ba ba unngwetsweng.

Se re saletseng ke go se dira jaanong ke go dira gore tiro eno e tsenyelediwe.

Ka ntlha ya Letsholo la Maditshegetso a go Tlhola Ditiro la Moporesitente, jaanong re na le batho ba feta makgolokgo-lo a diketekete ba ba nang le maitemogelo a a botlhokwa mo ditirong. Bontsi jwa batho bano go bonolo thata go ikgolaganya le bona gonne ba mo webesaeteng ya bašwa ba ba batlang ditiro ya SAYouth.mobi.

Re ikuela mo dikgwebong gore di thape bašwa bano ba jaanong ba sa tswang go iponela maitemogelo a ditiro fa letsholo leno le garela.

Fa bathapi ba ka sola mosola Letsholo la Maditshegetso a go Tlhola Bašwa Ditiro la Moporesitente ka go thapa bašwa mo webesaeteng eno, ke foo mo re tla bonang mosola ka botlalo wa letsholo leno le le tsamaileng le dira bontle e le ruri.